



kënnen dowéinst och d'Regierung nëmmen encouragéieren, fir där Accorde méi a méi séier ofzeschleissen, souwäit dat dann och nëmme méiglech ass.

Den zweete Kommentar ass: An der Aarbecht ëm dësen Text ass jo nach eng kéier rappéléiert ginn, ënner wéi enge Konditioneuren dës Chamber muss en internationalen Accord virgeluecht kréien, fir en ze ratifizéieren. An u sech ass et just esou, datt et nëmmen eng Ausnam gëtt bei confidentiellen Dokumenter, déi dës Chamber net muss virgeluecht kréien. Dat ass, wann et e rengen Rapport d'exécution ass, deen och nach explizitt als geheim agestuut ginn ass. Dat sinn déi zwou Konditioneuren, déi mussen erfëllt ginn. An den Ausseministère hat nach viru Joren en Avis juridique an där Saach geholl weinst engem Accord, dee mer mat der Belsch an deem Sënn hu missen ofschleissen.

Dofir wëlle mir nach eng kéier insistéieren, datt all Accord, esou wéi d'Constitution et och virgesäit, deen net déi du zwou Konditioneuren erfëllt, och der Chamber virgeluecht gëtt. Dat ass net ëmmer de Fall. Mir insistéieren awer, datt dëst Parlament seng voll Rechter an deem Beräich däréi ausüben.

Dat gesot, fir dësen Accord gi mer och ganz gär den Accord vun der ADR.

Villmools Merci.

► **Une voix.** - Très bien!

► **M. Mars Di Bartolomeo, Président.** - Merci. Domat si mer um Enn vun der allgemenger Diskussioun ukomm. An d'Wuert huet den Ausseminister.

Prise de position du Gouvernement

► **M. Jean Asselborn, Ministre des Affaires étrangères et européennes.** - Jo, fir ze soen, dass d'Regierung d'accord ass mat der Madamm Dall'Agnol.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci. Da géife mer zur Ofstëmmung iwwergoen iwwert de Projet 7175.

Vote sur l'ensemble du projet de loi 7175 et dispense du second vote constitutionnel

An d'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo eriwwer.

58-mol Jo, 2-mol Neen. Domat ass de Projet 7175 ugehall.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par Mme Martine Mergen), Claude Wiseler, Michel Wolter et Laurent Zeimet;

MM. Marc Angel, Frank Arndt, Mme Simone Asselborn-Bintz, M. Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen et Mme Cécile Hemmen;

MM. André Bauler, Gilles Baum, Mme Simone Beissel, MM. Eugène Berger, Frank Colabianchi, Lex Delles, Mme Joëlle Elvinger, MM. Gusty Graas, Max Hahn (par M. Gusty Graas), Alexander Krieps, Claude Lamberty, Edy Mertens et Mme Lydie Polfer (par M. Eugène Berger);

MM. Gérard Anzia, Henri Kox, Mmes Josée Lorsché, Viviane Loschetter, Sam Tanson et M. Roberto Traversini;

MM. Gast Gibéryen, Fernand Kartheiser et Roy Reding.

Ont voté non: MM. Marc Baum et David Wagner.

An ech wollt d'Chamber froen, ob se bereet ass, d'Dispens vum zweete Vott unzefroen?

(Assentiment)

Merci. Dann ass dat esou decidéiert.

A mir ginn zum nächste Projet iwwer, de Projet 7177, en Ofkommen tëscht Lëtzebuerg an der Belsch iwwer radioaktiven Offall. An d'Wuert huet erëm d'Madamm Rapporteur Claudia Dall'Agnol.

11. 7177 - Projet de loi portant approbation de l'Accord entre le Grand-Duché de Luxembourg et le Royaume de Belgique relatif à la gestion et au stockage définitif des déchets radioactifs du Grand-Duché de Luxembourg sur le territoire du Royaume de Belgique, fait à Gâichel, le 4 juillet 2016

Rapport de la Commission des Affaires étrangères et européennes, de la Défense, de la Coopération et de l'Immigration

► **Mme Claudia Dall'Agnol (LSAP), rapportrice.** - Dir gitt mech net esou séier lass de Mëtten. Här President, Merci nach eng kéier fir d'Wuert. Dir Dammen an Dir Härren allegueren, de Projet de loi, dee mer elo gläich wäerte stëmmen, huet nëmmen een Artikel, mä an deem Artikel, do stécht viles dran. Deposéiert gouf dëse Projet de loi och vun eisem Ausseminister den 28. Juli (veuillez lire: de 4. Septem-ber) d'lescht Joer.

Ëm wat geet et? Ma et geet drëms, e bilaterale Accord gutzeheschen, deen e legale Kader schafft, fir radioaktiv Offall aus Lëtzebuerg an der Belsch ze stockéieren. Firwat an der Belsch? Ma well mer hei zu Lëtzebuerg nëmme ganz, ganz kleng Quantitéiten dëser Offall produzéieren.

Wou kommen elo awer dës kleng Quantitéiten hier? Si entstinn zum Beispill an de Chimiescoursen am Lycée, wa bestëmmte Chemikalie matenee reagéieren an doduerch radioaktiv ginn. Deen een oder aneren huet vläicht bei sech doheem, an ech wëll lech elo keng Angscht maachen, nach eng ganz al Auer oder e Wecker, déi zum Deel eng Radioaktivitéit ausstrale kënnen. Da sinn et och Stécker aus Rauchmelderen a Metalldetektoren, déi radioaktiv sinn an entsprechend entsuergt mussen ginn. An da kënn natierlech nach ee ganz wichtegen Deel vun den Offäll aus de Laboratoire an aus dem medezinnesche Beräich, zum Beispill aus dem Centre de radiothérapie.

Wisou sinn des Quantitéiten hei zu Lëtzebuerg dann awer esou minimal? Ma well mer hei am Land eben de Prinzip hunn, fir esou weénege wéi méiglech där Offall ze produzéieren. Dass also esou Offäll ufalen an an e Centre de stockage geschéckt mussen ginn, ass also éischter d'Ausnam an och déi allerleschte Solutioun. A vu dass et esou weénege ass, géif et och guer kee Sënn maachen, hei am Land en eegene Centre de stockage ze bauen. An dofir gëtt da gekuckt, via bilateral Ofkommessen eis radioaktiv Offäll an auslännesch Centre-de-stockagen ofzeginn.

Zënter 1990 gëtt et en Accord ministériel tëschent eis an der Belsch. Dësen Accord huet et erlaabt, e puer Transferten dohin ze maache vu wéi gesot ganz kleng Quantitéiten. Elo ass et awer esou, dass dësen Accord net méi de Kritäre vun der Direktiv mat der Nummer 2011/70/Euratom, dat Wuert ass de Mëtten hei schonn e puermol gefall, entsprécht. Dofir ass eben elo e bilaterale Accord néideg, fir dass mer, wéi eben aganks scho gesot, iwwert deen néidege legale Kader verfügen, fir da, wann et néideg ass, en Transfert an eist Nopeschland ze garantéieren, a mer soumat evitéieren, selwer e Centre de stockage mussen ze bauen.

An eisem Nopeschland sinn dës radioaktiv Offäll och sécher opgehewen, well d'Belsch e gewëssenen Know-how op deem Gebitt huet. An iwwregens ass dëse bilaterale Accord eng Première op der Welt, wa mer deen dann herno esou wäerte stëmmen. Souvill zum Inhalt vum Projet de loi.

Zu eisen Aarbechten an der Chamber bleift ze soen, dass ech den 30. Abrëll dëst Joer als Rapportrice an der aussepolitische Kommissioun genannt gouf. An darselwechter Reuniooun hu mer de Projet analyséiert, mer hunn en diskutéiert a sinn och duerch den Avis vum Statsrot gaangen, deen iwwregens keng Remarken dozou gemaach huet. Mäi schréffleche Rapport gouf dunn de 7. Mee ugehall an haut hunn ech lech dann elo just mäi mëndleche Rapport zum Projet de loi gemaach.

Dat gesot, Här President, Dir Häre Ministeren, léif Kolleeginnen a Kollegen géif ech dovunner profitéieren, och nach eng kéier den Accord vun de Sozialisten zu dësem Projet de loi ze ginn an eng leschte kéier fir de Mëtteg vu menger Säit aus Merci fir d'Nolauschteren.

► **M. Mars Di Bartolomeo, Président.** - Merci och der Madamm Rapporteur. D'Wuert huet erëm direkt den Här Laurent Mosar.

Discussion générale

► **M. Laurent Mosar (CSV).** - Jo, Här President, och hei huet d'Madamm Rapportrice erëm, wéi mer dat vun hir gewinnt sinn, eng exzellente Aarbecht gemaach. Duerfir eise grouse Merci.

An ech bréngen heimat den Accord vu menger Fraktioun.

► **M. Mars Di Bartolomeo, Président.** - Merci. Den Här Graas.

► **M. Gusty Graas (DP).** - Merci, Här President. Mir hu jo de Mëtteg hei scho ganz vill iwwer Atomenergie, radioaktiven Offall geschwat. Hei bewege mer eis zwar an darselwechter Matière, mä a vill méi bescheidene Volummen. Ech mengen, mir kënnen jo als Lëtzebuerg frou sinn, datt d'Belsch sech bereet erklärt, eis bescheide Quantitéiten unzuhuelen.

Wann et erlaabt ass, vläicht de Kollege vun der Belsch awer mat op de Wee ze ginn, gewëssen Efforten ze maachen, wat eben hir zwee Atomreakteren ubelaangt. Dat ass de Mëtteg och schonn hei ernimmt ginn. Mä bon, dat gehéiert net direkt zum Gesetzesprojet, duerfir wäert ech dat hei och net weider verdéiwen.

Ech profitéieren allerdéngs vun der Geleeënheet, fir der Madamm Dall'Agnol e grouse Merci ze soen a brénge selbstverständlech och d'Zoustëmmung vun der Demokratescher Partei.

Merci.

► **Une voix.** - Très bien!

► **M. Mars Di Bartolomeo, Président.** - Merci. D'Madamm Loschetter huet d'Wuert.

► **Mme Viviane Loschetter (déi gréng).** - Jo, Här President, och mir schleissen ons nach eng kéier de Mercien un a ginn hei och den Accord vun der grénger Fraktioun.

► **M. Mars Di Bartolomeo, Président.** - Merci. Den Här Kartheiser huet d'Wuert.

► **M. Fernand Kartheiser (ADR).** - Jo, villmools Merci, Här President. E Merci nach eng kéier un d'Madamm Dall'Agnol fir hire Rapport. Et ass richtig, mir hunn als Lëtzebuerg am Allgemenge wierklech nëmme ganz kleng Quantitéiten. Mir kënnen awer och net ausschleissen, datt, wéi et eis scho virkomm ass, op eemol iergendwou en Eisebunnszwaggon ass mat méi grouse Quantitéit vun iergendwéi kontaminiéiertem Material. An ech mengen, mir mussen dann och d'Fro stellen: Géif dat dann och ouni Problem goen, fir dat an der Belsch ze deponéieren? A wat wieren d'Käschten dovun?

Ee Schéinheitsfeeler vun dësem Accord ass näamlech, datt d'Belsch unilateral d'Käschte ka festsetzen, datt déi net verhandelt ginn tëschent der Belsch a Lëtzebuerg, mä et ass d'Belsch, déi eis da berechent, wat mer mussen bezuelen. Et kann ee sech och froen, wéi d'Diskussioun an der Belsch virugeet ëm de Stockage vun de radioaktiven Offäll. Wéi d'Madamm Dall'Agnol richtig gesot hat, hu si och nëmmen e provisoiresche Site. An der Belsch gëtt et nach keen definitive Site fir radioaktiv Offäll. An et muss een also och d'Fro stellen: Wéi geet déi Diskussioun an der Belsch virun? An ass et wierklech eng op laang Dauer kredibel Léisung, déi eis hei proposéiert gëtt?

Dat gesot, gi mir awer och ganz gär den Accord vun der ADR fir dësen Accord.

► **M. Mars Di Bartolomeo, Président.** - Merci. A mir sinn um Enn vun der allgemenger Diskussioun ukomm. An d'Wuert huet den Här Ausseminister.

Prise de position du Gouvernement

► **M. Jean Asselborn, Ministre des Affaires étrangères et européennes.** - Ech géif meng Ried widerhuelen, déi ech beim leschte Gesetz gehalen hunn.

Merci.

► **M. Mars Di Bartolomeo, Président.** - Merci. Da géife mer direkt zur Ofstëmmung iwwergoen iwwert de Projet 7177.

Vote sur l'ensemble du projet de loi 7177 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo ofgeschloss.

59-mol Jo. De Projet 7177 ass unanime ugehall.

Résultat définitif: le projet de loi 7177 est adopté à l'unanimité des 60 votants.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par M. Claude Wiseler), Claude Wiseler, Michel Wolter et Laurent Zeimet;

MM. Marc Angel, Frank Arndt, Mme Simone Asselborn-Bintz, M. Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen et Mme Cécile Hemmen;

MM. André Bauler, Gilles Baum, Mme Simone Beissel, MM. Eugène Berger, Frank Colabianchi, Lex Delles, Mme Joëlle Elvinger, MM. Gusty Graas, Max Hahn (par M. Lex Delles), Alexander Krieps, Claude Lamberty, Edy Mertens et Mme Lydie Polfer (par M. Gusty Graas);

MM. Gérard Anzia, Henri Kox, Mmes Josée Lorsché, Viviane Loschetter, Sam Tanson et M. Roberto Traversini;

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Ass d'Chamber bereet, d'Dispens vum zweete Vott ze froen?

(Assentiment)

Merci. Dann ass dat esou decidéiert.

A mer géifen zum nächste Projet iwwergoen, dem Projet 7157 iwwert d'Ëmsetze vun Direktiven am Beräich vun de Finanzinstrumenter. An d'Wuert huet elo de Rapporteur, den Här André Bauler.

12. 7157 - Projet de loi du [--] relative aux marchés d'instruments financiers et portant:

1. transposition de la directive 2014/65/UE du Parlement européen et du Conseil du 15 mai 2014 concernant les marchés d'instruments financiers et modifiant la directive 2002/92/CE et la directive 2011/61/UE;

2. transposition de l'article 6 de la directive déléguée (UE) 2017/593 de la Commission du 7 avril 2016 complétant la directive 2014/65/UE du Parlement européen et du Conseil en ce qui concerne la sauvegarde des instruments financiers et des fonds des clients, les obligations applicables en matière de gouvernance des produits et les règles régissant l'octroi ou la perception de droits, de commissions ou de tout autre avantage pécuniaire ou non pécuniaire;

3. mise en œuvre du règlement (UE) n°600/2014 du Parlement européen et du Conseil du 15 mai 2014 concernant les marchés d'instruments financiers et modifiant le règlement (UE) n°648/2012;

4. modification de:

a) la loi modifiée du 5 avril 1993 relative au secteur financier;

b) la loi modifiée du 23 décembre 1998 portant création d'une commission de surveillance du secteur financier;

c) la loi modifiée du 5 août 2005 sur les contrats de garantie financière;

d) la loi modifiée du 7 décembre 2015 sur le secteur des assurances; et de

e) la loi modifiée du 15 mars 2016 relative aux produits dérivés de gré à gré, aux contreparties centrales et aux référentiels centraux et modifiant différentes lois relatives aux services financiers; et

5. abrogation de la loi modifiée du 13 juillet 2007 relative aux marchés d'instruments financiers, à l'exception de son article 37

Rapport de la Commission des Finances et du Budget

► **M. André Bauler (DP), rapporteur.** - Här President, léif Kolleeginnen a Kollegen, zéng Joer no der éischter Direktiv iwwert d'Mäert vun de Finanzinstrumenter mat dem schéinen engleschen Titel „Markets in Financial Instruments Directive“, kuerz MiFID genannt, ëmfaasst déi nei Versioun, also MiFID II, Dausende vu Säiten. Dat ass en décke Batz an et ass fir en aarme Jong vum Land - fir e mëttlerweil kuranten Ausdrock vum Gilles Roth opzegräifen - net ëmmer einfach, duerch de Bësch vun den technesche Wieder a Formulatiounen ze kommen. Dofir hunn ech grouse Respekt virun de Fachleit vum Finanzministère, déi sech ëmmer méi dacks mat komplizéierten Texter mussen ausereesetzen. Hinnen dofir schonn emol am Viraus vu menger Säit e grouse Merci fir hir Hëllefsbereitschaft an hir pertinent Remarken.



MiFID II soll d'Vertraue vun de Bierger an d'Finanzmäert weider stärken. D'Kris vun 2008 war effektiv eng Kris vun weltwäite Finanzsystem mat wirtschaftlechen a soziale Konsequenzen. Fir eng Kris vun deem Ausmooss an Zukunft ze evitéieren, ass et zu Reguléierung-sustrengunge komm. Dat wichtegst Zil vu MiFID II besteet doranner, fir méi e grouss Schutz vun de Privatinvestisseuren a méi eng grouss Transparenz vun de Mäert ze erreechen. D'Clienté solle vun Ufank u wëssen, wat fir Käschten op si duerkommen, an d'Produzente vu Finanzprodukter ginn e gudde Krack méi verantwortlisch gemaach.

De Gesetzesprojet, em deen et hei geet, huet als Zil, fir d'Direktiv 2014/65/UE, och nach MiFID II genannt, an nationaalt Recht ëmzesetzen. Dës Direktiv gouf vum europäesche Parlament a vum Conseil de 15. Mee 2014 ugehooll. Si betrëfft d'Finanzmäert, méi spezifesch d'Mäert vun de Finanzinstrumenter, a si ännert d'Direktiv 2002/92/CE an d'Direktiv 2011/61/UE ëm.

► **Une voix.** - Très bien!

► **M. André Bauler (DP), rapporteur.** - De Gesetzesprojet setzt och bestëmmten Dispositionen vum Reglement Nummer 600/2014, och nach MiFIR genannt, dat vum Parlament a vum Conseil de 15. Mee 2014 ugehooll gouf, ëm. Och d'Reglement betrëfft d'Mäert vun de Finanzinstrumenter an ännert d'Reglement 648/2012.

Weinst deene villen techneschen Ännerungen, déi dës Projet de loi um Gesetz vum 13. Juli 2007 iwwert d'Mäert vun de Finanzinstrumenter mat sech bréngt, schloen d'Auteure vir, eng komplett Refonte ze maachen. Et wäerten donieft och Ännerungen um modifizéierte Gesetz vum 5. Abrëll 1993 iwwert de Finanzsektor, och nach LSF-Gesetz genannt, virgeholl ginn.

Komme mer fir d'Éischt zum allgemenge Kontext an zu den Ziler vun dësem Gesetz! Zënter hirem Akraafttrieden am November 2007 ass d'Direktiv 2004/39 vum 21. Abrëll 2004 iwwert d'Mäert vun de Finanzinstrumenter, déi sougenannt MiFID-Richtlinn, eng Staip, op där d'Integratioun am Beräich vun de Mäert vun de Finanzinstrumenter berout.

Dës Direktiv hat zum Zweck, fir all d'Regele vun der EU iwwert d'Déngschtleeschungen am Investmentberäich wéi awer och déi reglementéiert Mäert ze verstärken. Dobäi sollen zwee Ziler erreecht ginn, eischters de Schutz vun den Investisseuren a vun der Integritéit vun de Mäert, andeems harmoniséiert Exigence fir déi agreéiert Intermediär festgesat goufen, an zweetens d'Promotioun, also d'Förderung, vun der Transparenz, der Wirksamkeit an der Integratioun vun de Finanzmäert.

D'Finanzkris vun 2008 an d'Entwécklungen op de Mäert, déi doraus erfollegt sinn, hunn awer Schwächen opgewisen, wat de Fonctionnement an d'Transparenz op de Finanzmäert ugeet. Et ass daitlech ginn, dass d'Mäert vun de Finanzinstrumenter méi staark reglementéiert mussen ginn, dës virun allem, fir d'Investisseuren ze schützen, hiert Vertrauen an de System ze stärken an déi net reglementéiert Domänen an Ugrëff ze huelen.

(**Mme Simone Beissel prend la présidence.**)

Donieft sollten d'Iwwerwachungsautoritéit mat zousätzleche Pouvoiren ausstafféiert ginn, fir hirer Missioun gerecht ze ginn.

D'Direktiv MiFID II muss gläichzäitig mam EU-Reglement 600/2014 iwwert d'Mäert vun de Finanzinstrumenter gelies ginn, dee sengersäits d'Reglement 648/2012 ofännert. Dëst Reglement ass d'application directe, et applizéiert sech also direkt an dat nationaalt Recht vun de Memberstaaten.

Dir mierkt elo schon, dass et sech bei dësem Projet ëm e ganz techneschen a detailléierten Text handelt. An dofir wäert ech mech als Rapporteur op déi Haaptpunkte beschränken.

Gesondheet, Här Gibéryen.

(**Hilarité**)

Fir all deenen Ziler, déi ech virdru genannt hunn, gerecht ze ginn, heescht et, verschidde-ne Exigence Rechnung ze droen.

Éischters: D'Finanzprodukter müssen op reglementéierte Plattformen gehandelt ginn. E puer Erklärungen dozou. Bei der Ëmsetzung vun dëser Direktiv an eist nationaalt Recht gëtt en neien Typ vun Handelsplattform agefouert. Et sinn dat déi sougenannt „Système organisés de négociations“, also organiséiert Handelssystemer. D'Äféierung vu méi strikten Transparenzregelen, déi op déi verschidde Plattformen applikabel sinn, huet als Zil, fir all Barrieren opzehuelen, fir dass eng méi gerecht a wirksam Präisbildung méiglech ass. Mat deenen neie Plattformen soll et och méiglech ginn, fir Finanzinstrumenter ze erreechen, déi bis ewell net ënnert d'Reglementatioun gefall sinn.

Zweetens: Dat zweet Zil ass et, fir den Zoutritt vun de klengen a mëttlere Betriber op d'Kapitalmäert ze vereinfachen.

Drëttens: D'Reglementatioun gëtt och un déi technologesch Innovatiounen ugepasst. Dozou e puer Explikatiounen. Dir wësst, den Trading huet an de leschte Joren eng staark Verännerung erlieft. Ëmmer méi Handelsaktivitéit ginn elektronesch a mat méi séierer Vitesse ëmgasat, hei denke mer un den algorithmeschen Trading an den Trading mat héijer Frequenz. Et sinn dat Aktivitéiten, déi op informatesch Programmer zrëckgräifen, fir Operatiounen duerchzuféieren mat Hëllef vu Finanzdonnéeën, déi séier à jour gesat mussen ginn.

Fir awer hei ze vermeiden, dass duerch d'Vitesse vun den Transaktiounen d'Risiko gesteigert ginn, bréngt d'Direktiv MiFID II eng Rëtsch Regele mat sech, déi derfir suerge sollen, dass dës Techniken den Trading op de Mäert net duerjerneerësen.

Véiertens: D'Spekulatioun op de Matière-première soll aegeschränkt ginn duerch d'Äféierung vun engem harmoniséierte System um Niveau vun der EU, e System, deen d'Grenze festleet, wat déi gehale Positiounen a Saachen Derivater op Réistoffer ugeet. Déi national Autoritéit kennen de Volume vun esou enger Positioun begrenzen. Dës Aschränkung huet als Zil, ze vermeiden, dass d'Spekulatioun eng Erhéijung vun de Präisser op de Produkter provozéiert, déi e Mënsch onbedéngt brauch fir ze liewen, esou zum Beispill Agrarprodukter.

De fënnefte Punkt betrëfft de Schutz vun den Investisseuren. Fir dës Schutz ze erhéien, gëtt gefuerdert, dass déi betrafte Firms beschtemméiglech am Interesse vun hire Clienten agéieren, wa se hinnen Investment-Déngschtleeschungen liwweren. Dës Firms si verpflichtet, fir d'Aktiva vun hire Clienten ze schützen a sech ze versécheren, dass d'Produkter, déi se lancéieren, esou ausgerichtet sinn, dass se de Bedierfnesser vun der Clientèle gerecht ginn.

D'Investisseure kréien och méi Informatiounen iwwert d'Produiten an d'Servicer, déi hinnen ugebuede ginn oder déi verkaaft ginn. Doriwwer eraus müssen déi betrafte Firmen derfir suergen, fir d'Leeschtung vun hirem Personal net esou ze bezuelen an net esou ze bewäerten, dass se géint d'Interesse vun hire Clienté ginn. Dat ka virun allem de Fall sinn, wann eng Bezuelung d'Personal derzou verleet, encouragéiert, bestëmmt Finanzinstrumenter ze recommandéieren oder ze verkafen, obwuel en anert Instrument wesentlech méi de Bedierfnesser vum Client entsprécht.

Zum sechste Punkt. Hei geet et ëm dräi nei Statute vu PSFen, also déi sougenannt „Professionnels du secteur financier“. MiFID II gesäit vir, dass verschidde Basisdaten iwwert d'Finanzmäert iwwer Kommunikatiounsservicer mussen geleescht ginn, déi een Agreement hunn an déi der Iwwerwachung vun de kompetenten Autoritéiten ënnerworfen sinn.

Dräi nei Statute vu PSFen ginn dofir an d'Liewe geruff. Ech hunn et d'Éinescht gesot, fir d'Detailer verweisen ech hei op mäi schrëftleche Rapport.

Komme mer dann elo zu de wichtegste Punkte vun MiFIR, also dem Reglement! Zesumme mat der Direktiv MiFID II huet dës Reglement als Zil, fir en neien harmoniséierte Kader ze definéieren, deen uniform Exigence festleet, déi op d'Finanzinstrumenter ze applizéieren sinn.

Beim éischte Punkt geet et ëm d'Verstärkung vun der Transparenz. Déi nei Regeln hunn als éischt Zil, derfir ze suergen, dass d'Verhandlung ronderëm d'Finanzinstrumenter an totaler Transparenz ofgewéckelt ginn.

Dat Zweet ass d'Verpflichtung, fir op reglementéierte Plattformen ze handeln, also am Kader vun engem MTF, dat heescht, engem multilateralen Handelssystem, oder zum Beispill enger Plattform vun engem Drëttstat, déi als equivalent ugekuckt gëtt.

Den drëtte Punkt betrëfft d'Deklaratioun vun den Transaktiounen op d'Finanzinstrumenter. D'Detailer dozou stinn a mengem schrëftleche Rapport.

De MiFIR-Reglement gesäit och Verpflichtungen fir d'Investment-Entreprisë vir, wat de Reporting vun den Transaktiounen un déi zoustänneg Reglementatiouns- an Iwwerwachungsautoritéiten ugeet. An dësem Fall ass dat jo d'CSSF. Dës Transaktiounen müssen an enger detailléierter Deklaratioun festgehalen ginn, fir dass d'CSSF potenziell Mëssbräich, sougenannt „Abus de marché“, kann detektéieren an doriwwer enquétéieren. Och geet et allgemeng drëm, derfir ze suergen, de gerechten a geregelte Fonctionnement vum Markt ze garantéieren an d'Aktivitéit vun den Investmentfirmen ze iwwerwaachen.

Nach e puer Wuert zur kompetenter Autoritéit. Den Artikel 44 vum Gesetzesprojet gesäit vir, dass d'CSSF déi kompetent Autoritéit ass, déi

mat der Iwwerwachung vun de Mäert vun de Finanzinstrumenter chargéiert ass. D'CSSF huet och als Missioun, dass d'Ëmsetzung vun dësem Gesetzesprojet vum Reglement MiFIR a vun de Moossnamen, déi geholl mussen ginn, fir et ze exekutéieren, stattfënn.

D'CSSF huet natierlech all Pouvoir vun Iwwerwachung a vun Ënnersichung, déi noutwendeg sinn, fir hire Fonctiounen nozekommen. Dozou gehéiert och d'Muecht, fir administrativ Moossnamen oder Sanktiounen auszeschwätzen. D'CSSF ass och verpflichtet, fir wirksam an zouverlässeg Mechanismen en place ze setzen, fir dass potenziell oder manifest Violatiounen notifizéiert kënnen ginn.

Den Artikel 49 vum Gesetzesprojet betrëfft d'Veröffentlechung vun dëse Mëssuechtungen. D'CSSF kann d'Aart vun de Violatiounen an den Auteur vun dësen op hirem Internetsite publizéieren. Gläichzäitig gesäit deen Artikel awer och vir, dass d'CSSF an deem Kontext e gewëssene Spillraum huet, fir d'Stabilitéit vum Marché ze garantéieren.

Do dernieft seet dësen Artikel och, dass d'CSSF déi europäesch Autoritéit vun de Finanzmäert iwwer all administrativ Moossnam oder Sanktioun informéieren muss, déi se publizéiert huet.

Madamm Presidentin, ech kommen zu den Avisa vum Statsrot. De Statsrot huet säin éischten Avis den 20. Februar 2018 geholl. An dësem Avis huet e formell Oppositione formuléiert. Esou huet en zum Beispill Remarken iwwert d'Nomenclature gemaach, esou wéi de Gesetzesprojet se zrëckbehalen huet. Dës Nomenclature géif mat Momenter par rapport zu där, déi d'EU-Reglement 600/2014 respektiv d'Direktiv 2014/65 virgesinn huet, ofweichen. Esou schwätzt de Gesetzesprojet zum Beispill vun „client particulier“ amplat vun „client de détail“. Dat géillt et deemno ze verbesseren, wat dann och geschitt ass.

Beim Artikel 45 iwwert d'Pouvoiren, déi der kompetenter Autoritéit zougestane ginn, do notéiert de Statsrot, dass de Pouvoir, fir d'Enregistrement vum de besteeënden informatesch Echanzen ze enregistrieren, déi een Telekommunikationsoperateur gesichert huet, dass dës Pouvoir net an der Lëscht vun de Pouvoir vum der CSSF ass, obwuel näischt si dovunner ofhale géif.

Dann huet de Statsrot nach kritiséiert, dass am Artikel 52 steet, dass sech den Informationsaustausch tëscht der CSSF an de kompetenten Autoritéit vun den anere Staten op Nofro hi mécht, sur demande also. Or, den Text vun der Direktiv seet awer klipp a kloer, dass déi betrafte Autoritéiten d'Informatiounen ouni Delai austauschen, esou wéi dat an hire Missioun steet. De Statsrot huet also verlaangt, dësen Iertum ze redresséieren.

Leschten Enns huet de Statsrot nach bemängelt, dass d'Dispositionen am Artikel 63, wat d'Verwaltung vun der offizieller Cote ugeet, ze vag gehale sinn. Hei gëtt verlaangt, esou wéi den Artikel 32 vun der Verfassung dat virgesäit, dass virun allem d'Dispositionen iwwert d'Zil vun den Ausféierungsmoossname souwéi d'Bedéngungen, deenen dës ënnerleien, an engem Gesetzestext müssen definéiert sinn an net an engem groussherzogleche Reglement.

Dofir huet déi héich Kierperschaft verlaangt, dass zousätzlech Präzisatioun komme müssen, wat den Artikel 63 ubelaangt. Och no de proposéierten Amendementer huet sech de Statsrot nach net zefridde gewisen, soudatt hien nach eng kéier seng Opposition formelle zu dësem Artikel bäibehalen huet, also se net ophiewe konnt.

Elo ass et esou, dass et kee Geheimnis ass, dass d'Zäit bei dësem Projet de loi ofgelaf ass. D'Europäesch Kommissioun leet lues awer sécher d'Muert op d'Säit an hält de Bengel eraus. Mir sinn deemno gutt beroden, d'Direktiv esou séier wéi méiglech ëmzesetzen, wat jo dann och haut geschéie soll.

De Statsrot huet hei eng Iwwergangsléisung virgeschloen, där mir an der Kommissioun nokomm sinn. Den Artikel 37 vum 2007er Gesetz iwwert d'Finanzmarchéë bleift bis op Weideres a Kraaft. Bei dësem Artikel geet et wéi gesot ëm d'Verwalte vun der offizieller Cote. D'Gesetz vun 2007 gëtt deemno bis op den Artikel 37 ganz abrogéiert.

Madamm Presidentin, ech hoffen, ech konnt e kuerzen Abléck an eng dach äusserst komplizéiert an technesch Matière ginn. Ech soe menge Kolleegen aus der Kommissioun, awer och de Beamten aus dem Finanzministère en häerzleche Merci fir d'Vertrauen a fir dat konstruktivt Zesummeschaffen.

lech alleguerte soen ech Merci fir d'Nolauscheren, jo eigentlech fir Är Gedold, a brénge gläichzäitig den Accord vu menger Fraktioun zu dësem Gesetzesprojet an.

► **Plusieurs voix.** - Très bien!

► **Mme Simone Beissel, Présidente de séance.** - Merci dem Här André Bauler. Als éischten agedroene Riedner hunn ech den Här Laurent Mosar. Kommt awer ganz hei un! Här Mosar, Dir hutt d'Wuert.

Discussion générale

► **M. Laurent Mosar (CSV).** - Merci, Madamm Presidentin. De Projet de loi, dee mer haut de Mëtten hei diskutéieren, ass an dëser Legislaturperiode een, wann net souguer vläicht dee wichtegste fir d'Finanzplaz, där hir Architektur wäert hei substanzuell verännert ginn.

Et geet, an den Här Rapporteur huet dat gesot, u sech hei ëm d'Ëmännerung vun enger éischer Direktiv aus dem Joer 2004 iwwert déi sougenannt „Marchés d'instruments financiers“, eng Direktiv, déi u sech vläicht dee wichtegste Peiler vun der Integratioun vun de Finanzmäert an der Europäescher Union ass.

Wann d'Virgängerin vun dëser Direktiv, nämlech déi sougenannt MiFID I-Direktiv erlaabt huet, d'Integratioun, d'Kompetitivitéit an d'Effizienz vun de Finanzmäert vun der Europäescher Union ze stärken, esou huet dach d'Finanzkris a ganz besonnesch d'Evolutioun vun de Mäert an deene leschte Jore gewisen, dass de Champ d'application vun där éischer Direktiv net wäit genuch gaangen ass an dass hei en absolute Besoin bestanen huet, fir de Schutz vun den Investisseuren ze stärken.

Duerfir dann och déi zweet Direktiv: Där hire wichtegsten Objektiv ass op där enger Säit, méi transparent Mäert ze schafen, op där anerer Säit awer och, de Schutz vun den Investisseuren ze stärken.

Dës Direktiv wäert dann awer doniewent virun allem den Autorité-de-surveillancen, an dësem Fall bei eis der CSSF, wesentlech méi an haaptsächlech awer och, wann een de Volume vun deenen Dispositione kuckt, well mir si rar mat enger Direktiv saiséiert, déi trotzdeem esou en déck Buch, bal schonn eng Bibel, duerstellt. Duerfir vu menger Säit aus e ganz grouss Merci un de Rapporteur, an ech wëll dann och eng kéier - „une fois n'est pas coutume“- trotzdeem hei e Merci un d'Mataarbechter vum Finanzministère richten, well déi hunn hei wierklech iwwer Wochen a Méint eng richtig Herkulesaufgab mussen bewältegen, fir kënnen dës Direktiv ze transposéieren. An ech ka sécherlech noffelen, dass dat net ëmmer déi passionnantsten Hausaufgab ass. Ech géif éischer soen, dass war relativ dréchen.

An dem Rapporteur säi Meritt ass dës kéier ganz besonnesch grouss, net nëmme weinst der grousser Technicitéit vun dësem Projet, mä haaptsächlech awer och, wann een de Volume vun deenen Dispositione kuckt, well mir si rar mat enger Direktiv saiséiert, déi trotzdeem esou en déck Buch, bal schonn eng Bibel, duerstellt. Duerfir vu menger Säit aus e ganz grouss Merci un de Rapporteur, an ech wëll dann och eng kéier - „une fois n'est pas coutume“- trotzdeem hei e Merci un d'Mataarbechter vum Finanzministère richten, well déi hunn hei wierklech iwwer Wochen a Méint eng richtig Herkulesaufgab mussen bewältegen, fir kënnen dës Direktiv ze transposéieren. An ech ka sécherlech noffelen, dass dat net ëmmer déi passionnantsten Hausaufgab ass. Ech géif éischer soen, dass war relativ dréchen.

Här President, ech kommen dann awer trotzdeem net derlaanscht, eng Kritik hei unzebréngen, nämlech déi, dass et esou laang gedauert huet, éier dës Direktiv konnt transposéiert ginn. Et ass gesot ginn, déi Direktiv ass u sech vun 2014. Mir hätte se scho misse säit engem Joer transposéiert hunn. Si gëtt dann elo awer mat engem substanzuelle Retard transposéiert. Mir bedauern dat. Ech wëll awer elo net erëm op déi Kriticken agoen, déi mer schonn e puermol hei virbruecht hunn, wou mir der Meinung sinn, dass de Finanzministère vläicht och misst vun den Effektiver nach e bëssleche méi opgestockt ginn.

Ech begreissen dann awer och - an ech mengen, et muss ee jo och Saache luewen, déi ze luewe sinn -, dass d'Majoritéit, awer och d'Regierung enger fundamentaler Suerg vum Statsrot, awer och vun eiser Fraktioun, entgéintkomm ass, fir keng retroaktiv Applikatioun vun dësem Text ze maachen, mä dës Projet trëtt genausou a Kraaft wéi all normale Projet de loi. Et wär nämlech fir mech e falscht Signal gewiescht, fir bei engem dach fir d'Finanzplaz extrem wichtige Projet, dës retroaktiv a Kraaft trieden ze loosse.

Madamm Presidentin, ech wëll hei wierklech net méi an den Detail vun deene ganz villen techneschen Dispositionen agoen, wéi gesot, de Kolleeg André Bauler huet dat gemaach. Ech wollt mech duerfir a menger Interventioun just op e puer ganz prinzipiell Observatiounen beschränken.

Eng éischt Observatioun - an ech hunn et virdru ugedeit - ass, dass an Zukunft déi europäesch Regulateuren an natierlech dann och d'CSSF ganz vill zousätzlech Kompetenze wäerte bäikréien. Ech weess, an ech wëll dat och hei ënnersträichen, dass d'CSSF gutt opge-



stallt ass, fir dës grouss Erausforderungen ze schëlleren, souwuel um Niveau vun hiren Effek-tive wéi awer och an der Preparatioun vun der Ëmsetzung vun dëser Direktiv, well d'CSSF an hir ganz valabel Mataarbechter hu jo elo net gewaart, datt mir haut géifen iwwert de Projet diskutéieren an ofstëmmen, ier se sech scho mat der Thematik befaast hunn.

Ech wëll iwwregens hei och eng Kéier eng Klammer maachen: Ech fannen iwwregens, datt d'CSSF eng exzellent Aarbecht mécht. An ech hunn och heiansdo Problemer, muss ech soen, nozevollzéien, wann een an der Press do staark Kritikke liest, well ech eigentlech fannen, datt vun där ganzer Direktioun, awer haapt-sächlech vun deene ganz, ganz ville Mataar-bechterinnen a Mataarbechter hei an enger deelweis extrem komplizierter Matière eng gutt Aarbecht geleescht gëtt.

Ech sinn also optimistesesch, datt, wann elo d'Gesetz a Kraaft trëtt, d'CSSF wäert prett sinn, fir och um Terrain déi nei Spillregelen ëmzesetzen, mä och haaptsächlech d'Kontroll an d'Surveillance vun dëser Ëmsetzung ze maachen.

Allerdéngs, Madamm Presidentin, an da kommen ech op dee Punkt, deen ech schonn e puermol hei opgeworf hunn, nämlech deen, datt jo och elo an dësem Text erëm eng Rei vu substantielle Sanktiounen virgesi ginn, déi d'CSSF dann och kann an Zukunft spriechen, wann eenzel Akteure sech net un déi Virgabe vun der MiFID II halen.

An do wëll ech dann nach eng Kéier e waarmen Appell - an et ass wierklech net deen éischten - un Iech, Här Finanzminister, riichten. Mir wëssen alleguerten, datt d'CSSF an dëser Thematik wéi a ganz villen aneren och Partei a Richter gläichzäiteg ass. An dës ass eng ganz ongesond Situatioun, déi och riskéiert, mëttelfristeg eng Kéier zu Recoursen ze féieren, notament virun der Cour vu Stroossbuerg. An ech fäerte ganz, wann een d'juristesch Situa-tioun analyséiert, datt et eis hei äänlech kann ergoe wéi deemools am Arrêt Procola am Kontext vum Statsrot.

Ech géif wierklech duerfir nach eng Kéier wë-len ënnerträchen, wéi wichteg et ass, Här Mi-nister, datt mer déi zwou Fonctiounen trennen. Ech weess och, datt ech net deen Eenzege sinn hei an deem Haus, deen déi Suerg huet, well notament de Kolleg Fayot dat och schonn déi eng an déi aner Kéier ënnerstrach huet. A souguer den Här Generaldirekter vun der CSSF huet eng Kéier an engem Interview op déi Noutwendegkeet do higewisen.

Duerfir wär ech awer wierklech frou, Här Mini-ster - well ech et schonn e puermol gesot hunn, ech waarden allerdéngs nach ëmmer op eng kloer Äntwert vun Iech -, wann Der eis de Mët-teg géift soen, wou dee Projet de loi do drun ass, ob Der nach gedenkt, datt dee virum Enn vun dëser Legislaturperiod wäert deposéiert ginn.

Madamm Presidentin, wann ech vun där doter Thematik schwätzen, da kommen ech awer och net derlaanscht, nach eng Kéier op en anere Risk vu Reputatioun (veuillez lire: en anere Risk fir d'Reputatioun vun der Finanz-plaz) anzegoen, deen ech och schonn e puer-mol hei ugeschnidden hunn a wou ech och wierklech frou wär, wann ech et géif fäerdeg-bréngen, och do d'Regierung an deen zoustän-nege Regierungsmember duerfir ze sensibili-séieren.

Dir, d'Regierung, d'Chamber, mir maache ganz vill Efforten ëmmer erëm, fir international Re-glementatiounen, Accorden ëmzesetzen. Mä mir wëssen, dat eleng geet net duer. Och den Netrespekt vun Dispositiounen, déi mer hei adoptéieren, muss sanktionéiert ginn. An ech hunn et virdu gesot, ech fannen, datt eigent-lech hei d'CSSF e gudder Match mécht. Déi hu schonn eng ganz Rei vun Enquêtes, Ins-truktiounen géint eenzel Etablissementer hei ge-maach. Si hunn och do zum Deel scho ganz substantiell Amendé géint deen een oder ane-ren Akteur prononcéiert.

Allerdéngs dat, wat mir an eis feelt, ass, datt keng stroferechtlech Konsequenze kommen. A kommt, mir maachen eis näischt vir! Wann hei eng CSSF Amendé vun e puer Milliounen Euro prononcéiert, Dir Dammen an Dir Hären, dann ass dat net, well do just eng Bank Bilanen net zurzäit publizéiert huet. A mir wëssen alleguer-ten, datt spéitstens 2020 deen nächsten Avis vun dem GAFI eis an d'Haus steet. An do wär et wierklech net gutt fir d'Reputatioun vun eiser Finanzplaz, wann do net wierklech endlech och an den nächste Méint emol géifen Affäre vu Finanz- a Wirtschaftskriminalitéit poursui-véiert ginn.

Ech weess, Här Finanzminister, datt dat net direkt an Är Kompetenz fällt. Ech weess awer och, datt Dir fir deen dote Sujet sensibel sidd. An ech wollt, wéi gesot, bei der Geleeënheet vun der Diskussioun vum Projet de loi nach eng Kéier dorobber hiweisen.

Madamm Presidentin, ech kommen dann zu menger zweeter Observatioun. An déi bezitt sech eigentlech op déi ganz Thematik vum Échange d'informations, deen och elo an Zu-kunft tëschent deene verschiddene Regulateure wäert kommen. Do wëll ech fir d'Alleréisch-t nach eng Kéier op d'Wichtigkeet och vum Res-pekt vum Berufssgeheimnis vun deene ver-schiddenen Autoritéiten hiweisen. An erlaabt mer et do trotzdeem, eng Fro opzuerwerfen, déi sech elo schonn e puermol gestallt huet a wou mer och erëm op engem aneren Niveau eigentlech e Präzedenzfall haten!

Hei geet et mir virun allem drëm, datt jo d'CSSF kann an d'Zukunft och nach ka méi Decisiounen huele géint gewëssen Akteuren. A mir haten elo dee konkrete Fall bei enger lette-scher Bank, déi quasiment vun der CSSF vun engem Dag op deen aneren zougemaach gëtt. Et ass allerdéngs elo esou, datt déi concernéiert Akteuren eréischt kënnen e Recours maache géint déi Decisioun, wann d'CSSF eng Amende sprécht. A géint déi Amende kann natierlech déi Bank oder deen Akteur bei der Juridiction-administrativen e Recours aleen.

Elo wësse mer awer alleguerten och an dësem Text, datt et eng ganz Rei vu Méiglechkeete ginn, wou d'CSSF kann intervenéieren, wou net direkt e Recours virgesinn ass. An no-tamment dat Beispill vun där lëttescher Bank ass e gutt Beispill, well do ass den Dossier jo du virugaangen un d'Juridiction de droit commun. An duun eréischt konnt déi concernéiert Bank do hir Rekursméiglechkeete spille losse mam Resultat, an do wëll ech net nach eng Kéier drop agoen, datt eigentlech u sech déi Deci-sioun vun der Mise en liquidation reforméiert gouf.

Dat, wourop ech eigentlech eng Kéier wollt opmierksam maachen, dat ass, datt mer jo schonn eng Kéier en äänleche Fall hate beim Échange d'informations um Niveau vun de Steierverwaltungen. Do wësst Der, datt juste-ment kee Recours virgesi war an datt mer du condemnéiert gi si vum Europäesche Ge-richtshaff, esou e Recours anzeféieren. An ech froe mech och - an dat ass eng Fro, déi ech och wollt stellen a wou ech frou wär, wann Der herno vläicht kéint drop äntwerten -, ob mer net awer hei Gefor lafen, eventuell op enger Decisioun, wou keng Rekursméiglechkeet direkt besteet um Niveau vun der CSSF, kënnen herno och condemnéiert ze gi vum Euro-päesche Gerichtshaff.

Madamm Presidentin, ech kommen domadder zu menger leschter Observatioun. An dat ass och schonn eng traditionell, déi ech e puermol hei scho virbruecht hunn. An hei géif ech vläicht nach eng Kéier domat ufänken an de Fi-nanzminister froen - ech weess net, ob en dat elo de Mëtteg ka maachen, datt en eis vläicht déi Informatiounen soss kéint zoukomme loos-sen -, wat genau den État de ratification vun dëser MiFID II-Direktiv um Niveau vun der Eu-ropäescher Unioun respektiv doriwwer eraus ass.

Et ass nämlech prioritär, datt am Respekt vum „level playing field“, dee jo och dem Finanzmi-nister ganz staark um Häerz läit, natierlech esou schnell wéi méiglech all Länner an der Unioun an och doriwwer eraus déi Ratifikatioun vun dese ganz wichtege Reglementatiounen vir-huelen, fir och sécherzestellen, datt se sech iwwerall applizéieren.

Allerdéngs, an do kommen ech dann e bes-selchen op dee Problem, dee mer Suerge mécht, hunn ech d'Gefill, datt, wann ech dann och e bësselchen déi heiten Direktiv a Relatioun setze mat de BEPS-Mesuren, mer do um Ni-veau vun der OECD net méi esou richtig viru-kommen.

Firwat komme mer net méi esou richtig virun? Well ganz besonnesch vun amerikanescher Säit trotzdeem an de leschte Wochen a Méint rela-tiv vill blockéiert gëtt an d'Amerikaner schén-gen haaptsächlech och e Problem ze hu mat deene ganz villen Transparenzbestëmmungen, déi souwuel an der MiFID II-Direktiv virgesi si wéi iwwregens och an deene ganze BEPS-Me-suren.

A mir gesinn ëmmer erëm, datt do déi ameri-kanesch Zentralregierung dës Obligatiounen einfach net wëllt hire verschiddenen Autoritéi-ten an deenen diverse Staten imposéieren. An do denken ech natierlech haaptsächlech u State wéi den Delaware, wou dann ëmmer erëm vu Washington gesot gëtt, datt si vu Washington aus dem Delaware do iwwerhaapt näischt ze imposéieren hunn, soudatt ech hei e bësselchen d'Gefill hunn - an ech wär och frou, wann den Här Finanzminister herno dorobber kéint agoen -, datt den Drock awer um Niveau

vun der OECD an de leschte Méint, ganz be-sonnesch säitdeem d'Trump-Administratioun do un der Muecht ass, awer nogeloss huet.

Madamm Presidentin, ech kommen domadder zum Schluss, fir nach eng Kéier ze soen, datt dee Projet, dee mer haut wäerte stëmmen, eis Banken an eis Investitiounslandschaft wäert substantiell verännern, dës souwuel um Ni-veau vun der Transparenz wéi awer och vun der Sécherheet vun den Investisseuren. Dës Gesetz wäert sécherlech eng Rei vu positive Konsequenzen och fir eis Finanzplaz hunn. Al-lerdéngs dierf een net vergiessen, datt d'Ëm-setzung vun dese villen neie Regeln erëm mat engem net onsubstantiellen zousätzleche Käschtepunkt fir eis Banke wäert verbonne sinn.

Iwwerhaapt, an dat ass dann déi lescht Suerg, mat där ech wëll ophalen, de Käschtepunkt vun all dese Reglementatiounen fir d'Finanz- a Bankewelt gëtt ëmmer méi en enorme Käsch-tefacteur an et gëtt mer och gesot, datt et och haaptsächlech ëmmer méi schwéier gëtt, fir iwwerhaapt den Know-how nach ze fannen hei bei eis am Land, fir dann iwwerhaapt och do déi Mesuren an deene verschiddene Banken-haiser kënnen ëmzesetzen.

Wann een da weess, datt nach zousätzlech Direktiven an der Maach sinn, weess een, datt an den nächste Méint a Joren och nach zousätzlech Efforten do wäerte vun eiser ge-samter Finanzplaz gefuerdert ginn.

Nach, an ech mengen, dat wësse mer alleguer-ten, hu mir keen anere Choix a mir sollen dës Reglementatiounen esou schnell wéi méiglech ëmsetzen. Mir deelen do d'Approche vun der Regierung, fir zu de First-moveren ze gehéie-ren, well et trotzdeem extrèmement wichteg ass, och fir d'Reputatioun vun eiser Finanzplaz.

Dat gesot, Madamm Presidentin, wäerte mir dës Gesetz stëmmen an ech bréngen heimd-der och den Accord vu menger Fraktioun.

Ech soen Iech Merci.

► **Plusieurs voix.** - Très bien!

► **Mme Simone Beissel, Présidente de séance.** - Merci dem Här Laurent Mosar. Als nächsten ageschriwwene Riedner hunn ech den Här Franz Fayot. Här Fayot, Dir hutt d'Wuert.

► **M. Franz Fayot (LSAP).** - Merci, Madamm President. Léif Kolleeginnen, Léif Kolleegen, dese Projet de loi geheit mech e bëssen zrëck a meng Jugend, un d'Enn vu menge Studien, wou ech effektiv zum Schluss vu mengem DEA zu Paräis mäi Memoire gemaach hunn iwwert d'Transpositioun vun der Directive «Services d'investissement», 1993. Dat heescht mäin DEA war 1996 an ech hunn do effektiv e Sum-mer laang geschweesst iwwer esou Saachen, déi ech net gutt kannt hunn, wéi: reporting, pré/post transactions, transparence, règles de conduite, adéquation des fonds propres.

Ech géif haut ganz bestëmmt en anere Sujet de mémoire sichen. Mä nichtsdestotrotz war dat d'Okkasioun, fir mech an dës Matière eranze-schaffen, well d'Directive «Services d'investisse-ment» war d'Groussmamm vun dësem Text, dee mer haut stëmmen. Dat war den Ufank vun der europäescher Reglementatioun am Beräich vun der Opsicht vun de Finanzmäert.

An Dir kënnt Iech vläicht erënneren, dass 1992 ënnert dem Bill Clinton de Glass-Steagall Act ofgeschafft ginn ass. Dat war dat Gesetz, wat u sech no der grousser Depressioun vun 1929 d'Trennung vum Investmentbanking an de Banques de détail agefouert hat. An 1992 gëtt allgemeng e bëssen ugegi wéi d'Gebuertstonn vun enger Finanzindustrie, déi sech ëmmer méi vun der reeller Wirtschaft lassgekoppelt huet a mat enger Mëschung vu Gier, vu laxer Re-glementatioun an op eemol och bëllegem Geld zur globaler Finanz- a Weltwirtschaftskris vun 2008 gefouert huet.

D'Directive «Services d'investissement» konnt dat net vermeiden. Si ass 1996 transposéiert ginn, Enn 90er Joren, Ufank 2000er Jore war d'Dotcom-Bulle, déi geplatzt ass mat enger éischter Kris. D'MiFID, déi 2004 verabschit goug an 2007 agefouert gouf, konnt och déi grouss global Finanzkris net vermeiden. An et sief dohigestallt an et kann een et bezweifelen, dass MiFID II wäert à même sinn, déi nächst Fi-nanzkris ze evitéieren, déi ganz bestëmmt op ons duerkënn.

Dat gesot, ass MiFID II trotzdeem e wichtige-n Text. E gëtt allgemeng begréisst als eng „land-mark“, als eng ganz wichteg Reform vun den europäesche Finanzmäert, déi och e groussen Impakt huet op d'Akteuren an op d'Infra-struktur an op d'Transparenz vum Marché. Dat ass gesot gi vu menge Virriedner an no-tamment och vum André Bauler, dee fir e Landjong nawell e ganz gudder Rapport zu dë-ser technescher Matière gemaach huet, fir deen ech em och Merci soen.

(Brouhaha)

Et ass, wéi gesot, eng wichteg a gréisser Re-form. Mir haten d'lescht Woch den EU-Day, wou mer u sech am Fong ons alleguerten emol erëm eng Kéier virun Ae gefouert hunn, firwat d'EU wichteg ass an a wat fir enge Beräicher se wichteg ass. An ech mengen, dat hei ass och ee Beräich, wou d'EU am Fong dee Gremium ass, déi Organisatioun, wou ee kann ambitiéis Texter wéi dësen duerchbréngen, déi ee ganz sécher op nationalem Niveau net géif duerch-bréngen.

Dësen Text geet vill méi wäit wéi déi éischt Mi-FID a munche Beräicher. Et ass scho gesot ginn, mä ech wëll just ganz kuerz drun erënneren, d'Protektioun vun de Clienten, dat si Regeln, déi an der Kontinuitéit vu MiFID I sinn, mä déi vill méi strikt sinn, wat déi Instrumenter ugeet, déi dierfe verkaaft ginn u Clienten, déi och méi Informatiounen mat sech bréngen an och natier-lech méi Obligatiounen fir d'Intermediären.

Dësen Text bréngt ganz kloer weider Ver-pflichtunge fir d'Banken, fir all déi Intermediäre mat sech, déi an de Finanzmäert aktiv sinn. Dat ass natierlech net populär, och net op onser Fi-nanzplaz, mä et ass awer wichteg, well MiFID II zitt all d'Lektiounen aus deene Verfeelungen, déi während der leschter Finanzkris constatéiert gi sinn, déi aus deem Court-termismus, aus deene Bezuelungspraxisse vun den Transaktioun-en an all méiglechen anere Praxisse eraus-gaange sinn. An dofir ass et en Text, deen een am Fong nëmme vun deem Point de vue ka begrëssen.

Dësen Text bréngt och méi Transparenz op de Finanzmäert. E bréngt et och mat sech, dass fir d'éischte Kéier nei Forme vun Handel, deen op neien Technologie baséiert wéi den „high-frequency trading“, wéi den Handel duerch Al-gorithmen, dës Kéier reglementéiert ginn. An och dat ass natierlech e Fortschritt an eng gutt Saach. E begrenzt och den Handel mat Deriva-tiven iwwer Liewensgidder a Rohstoffe. Och dat ass scho gesot ginn. Dat ass och ze begréis-sen. An e bréngt och méi Pouvoir fir de Regu-lateur mat sech.

Dësen Text ass och dowéinst wichteg, well hei d'CSSF elo erëm de vollen Ausmooss vun hire Pouvoir kritt an notament och an der euro-päescher Kooperatioun. D'CSSF war am Fong an där Situatioun elo säit Januar, dass se net méi am vollen Ausmooss konnt zum Beispill eu-ropäesch Passeporten ausliwweren. An engem Pre-Brexit-Kontext ass dat natierlech problema-tesch. Dat heescht, elo kann d'CSSF, wa mer deen Text hei gestëmmt hunn, am Fong erëm voll kooperéieren mat deenen aneren euro-päesche Regulateuren an och hir europäesch Kooperatioun erëm voll wouerhuelen.

Trotz dem Fait, dass mer dësen Text stëmmen, dierf een net aus der Siicht verléieren, dass et aner Instrumenter gëtt, déi optauchen an déi am Fong komplett ënnert dem Radar sinn. Mir hate virun net allze laanger Zäit eng Debatt iwwer Kryptowärungen. Do ginn op eemol Ins-trumenter gehandelt iwwer Internet a vun In-termediären, déi hei net dësem Text ënner-leien, déi komplett onreguléiert sinn, wou et keng Kontroll driwwer gëtt an déi riseg Risike fir d'Investisseure mat sech bréngen.

Ofschléissend, Madamm Presidentin, wëll ech just eng Observatioun maachen zu dësem Text, déi mer awer trotzdeem e bësse Suerge mécht. Mir sinn hei amgaangen, effektiv iwwer ee vun deene wichtigsten Texter an dëser Legislatioun ze schwätzen, wat onse Finanzsektor ugeet.

Mir wëssen alleguer ëm d'Wichtigkeet vun dësem Secteur fir d'Lëtzeburger Wirtschaft. An et ass awer esou, dass dat heiten en Text ass, deen duerch seng extrem Komplexitéit, duerch säin enorme Volume am Fong deene mannste Leit zougänglech ass.

Wa mer elo éierlech sinn, da geet dat deene meeschte Kolleegen hei an der Chamber kom-plett laanscht de Kapp - ech wëll elo kengem ze no trieden - an dat ass och normal. Dat ass en Text, deen, de Rapporteur huet et gesot, bal dausend Säiten huet. Et kommen nach Mesures de niveau deux dobäi, déi och nach extrem de-tailéiert an technesch sinn. An dat ass, mengen ech, e Problem vun demokratescher Legitimi-téit, vu Comprehensivitéit vun deenen Texter, well dësen Text betrëfft net nëmme d'Banken an d'Akteuren vun der Finanzplaz. E betrëfft eben och déi Leit, déi investéieren an d'Finanz-instrumenter, e betrëfft d'Clienten, d'Justiciabe-len.

An ech mengen, dass ee wierklech soll seriö driwwer nodenken, sief dat op europäeschem Niveau oder op nationalem Niveau, ob een net iergendeng Vulgarisatioun ka fanne fir dës Tex-ter, dass ee se de Leit méi zougänglech mécht, dass ee se méi verständlech mécht fir am Fong Leit, déi sech trotzdeem fir dës Matière interes-séieren.

Ech mengen, dat wär am Sënn vun engem bes-sere Verständnis vun der europäescher Re-glementatioun, déi gutt ass, mä déi einfach



duerch de Volume an duerch d'Komplexitéit de Leit net méi zougänglech gëtt.

Dëst gesot, ass dat hei natierlech en Text, dee mir als LSAP matdroen, well en nach eng Kéier e Schrëtt an déi richteg Richtung ass, an d'Richtung vun engem besser kontrolléierten a besser superviséierte Finanzmaart, méi strikte Finanzmaart och. An dofir droe mir dësen Text natierlech mat.

Dëst gesot, soen ech lech Merci fir d'No-lauschteren.

► **Plusieurs voix.** - Très bien!

► **Mme Simone Beissel**, *Présidente de séance.* - Merci dem Här Fayot. Als nächst age-droe Riednerin hunn ech d'Madamm Viviane Loschetter. Madamm Loschetter, Dir hutt d'Wuert.

► **Mme Viviane Loschetter** (*déi gréng*). - Jo, Merci, Madamm Presidentin. Merci dem Rapporteur. Ech kann net aus menger Studenten-zäit erzielen,...

► **Plusieurs voix.** - Dach!

► **Mme Viviane Loschetter** (*déi gréng*). - ...betreffend dëse präzise Projet.

► **Plusieurs voix.** - Aah!

► **Une voix.** - Et ass elo de Moment.

(*Hilarité*)

► **Mme Viviane Loschetter** (*déi gréng*). - Jo. Dofir wäert ech mech beschränken, andeem ech den Accord vun der grénger Fraktioun ginn zu dësem Projet.

► **Mme Simone Beissel**, *Présidente de séance.* - Ma Merci, Madamm Loschetter. Dann hunn ech nach den Här David Wagner op der Lëscht.

► **M. Roy Reding** (*ADR*). - Madamm Presidentin!

► **Mme Simone Beissel**, *Présidente de séance.* - Ah pardon, Här Reding!

► **M. Roy Reding** (*ADR*). - Et ass net schlëmm. Ech wollt och am Numm vun der ADR dem Rapporteur Merci soen. Ech sinn net esou pessimisteschen wéi de Franz Fayot. Ech denken, souwuel de Rapporteur wéi de Kolleg Fayot wéi och de Kolleg Mosar hunn déi Matière elo hei wierklech zougänglech gemaach, net an den Detailler, mä awer an de grouse Linnen, wourëm et geet. An dat ass och dee Grond, firwat datt mir als ADR deen Text matdroen, well et ëm Konsumenteschutz geet an ëm d'Transparenz bei Finanztransaktiounen.

Ech soe speziell dem Laurent Mosar Merci, well en op e puer Punkten higewisen huet, déi och eis als ADR ganz vill um Häerz leien. Et ginn effektiv hei administrativ Käschte verursaacht, déi héich sinn an déi net ëmmer gerechtfertegt sinn. Ech soen nach ee Wuert dozou. Déi Käschte sinn net nëmmen zulaaschte vun de Banken, mä déi Käschte sinn in fine zulaaschte vun de Clienten, well d'Banke komme jo guer net derlaanscht, fir esou administrativ Käschten ofzewälzen.

Dir hutt och gesot, Kolleg Mosar, datt vill Banke sech scho preparéiert hätten, d'CSSF wier preparéiert, dat ass och gutt esou. Se sinn esou gutt preparéiert, datt schonn déi éischt Questionnairen op Basis vun deem Text hei eraus sinn. A wann ech da gesinn, datt ee fir e Compte courant vun enger Firma, déi soss näischt huet wéi en Immobiliebesëtzer an déi kengerlee Transaktiounen mécht a Finanzleeschtungen, muss esou e Pak Formulieren ausfüllen, dat ass jo net nëmme fir de Client, deen dat muss ausfüllen, lästeg.

Dat sinn Examensfroen. Do gi Saache gefrot wéi: Wéi evoluéiert de Cours vun engem Call, wann d'Course vun der Aktie eropginn? Oder wann ech eng Obligation convertible hunn an den Aktienpräis geet erop, wéi evoluéiert dann de Cours vun där Obligation convertible? Geet deen erop oder erof? An da muss een dorobber äntwerten, fir datt d'Bank gesäit, wéi gutt datt ee Bescheid weess iwwer Finanzinstrumenter, dat, wéi gesot, fir eng ganz normal kleng Immobilienfirma, déi guer net op deem dote Maart aktiv ass.

Mir gesinn also den Nodeel vun deenen doten Texter, datt awer eppes kreéiert gëtt, wat um Schluss eng Usine à gaz ass, déi net ëmmer néideg ass, net ëmmer nützlich ass an déi, an do deelen ech dem Kolleg Fayot säi Pessimismus, héchstwahrscheinlech déi nächst Finanzkris och net wäert evitéieren.

Ech soen lech Merci.

► **Mme Simone Beissel**, *Présidente de séance.* - Merci dem Här Reding. Dann ass et elo un dem Här Wagner.

► **M. David Wagner** (*déi Lénk*). - Merci, Madamm Presidentin. Jo, et ass vum Käschtepunkt geschwat ginn, deen d'Finanzplaz hei zu Lëtzebuerg fäert mat der Ëmsetzung vun dëser

Direktiv. Wann een allerdéngs näischt ënnerhëlt an deem Domän, da kenne mer de Käschtepunkt weltwäit fir d'Mënschen, dat ass eng Veraarmung respektiv och eng Verhéngerung vu ganzen Deeler vun der Weltbevölkerung. An ech mengen, datt dee Käschtepunkt eis méi Suerge muss maache wéi déi puer Suerge vun engem klengen Milieu, dee gewëssen Aktivitéiten huet.

Ech mengen, et ass natierlech eng komplizéiert Matière, den Här Fayot huet dat virdru gesot. A wann ee ganz éierlech ass, selbstverständlech mengen ech, ka keen hei behaupten oder ganz weëneg, op jidde Fall ech ziele mech net zu deenen, déi kéinte behaupten, datt se sech dat alles duerchgelies hätten. Ech hat einfach materiell déi Zäit net dofir. A wann ech et nach géif hirkreien, misst ech och nach alles verstoen.

An et ass e reelle Problem, mat deem mer konfrontéiert sinn. An dat ass oft esou a Finanzfroen. Dat heescht awer net, datt ee guer näischt ka verstoen, well hei si mer mat enger Fro befaasst, déi engersäits natierlech d'Lektionen zitt aus der Zäit vun der leschter Finanzkris ënner anerem, a wou decidéiert gouf, datt op eng méi reglementéiert a ganz transparent Aart a Weis misst op de Finanzmäert mat Derivater, déi och justement mat Spekulationen vun Narungsmëttel ze dinn hunn, gehandelt ginn.

An da muss een natierlech och, wat ech da maachen an esou enger Situatioun, sech informéieren bei Organisatiounen, déi sech méi spezifesch mat der Fro auserneesetzen. Do ginn et verschidde Schoulen. Déi eng, déi schwätze vläicht da mat engem Finanzakteur, gi mat deem iessen an esou weider, fir ze kucken: Wat mengs de? Dat ass net meng Schoul.

Meng ass éischter déi, datt ech dann aner Quelle kucke gi wéi Oxfam oder esou. An déi soen: Jo, MiFID II ass an enger gewëssener Hissicht en Effort. Am Europaparlament goufen et vill Kämpf, och Lobbyarbecht vu gewëssene Milieuen, déi gefouert gi sinn. Et ass hin- an hiergaangen. A schlussendlech ass et en Effort, mä et geet net wäit genuch, zemoos wann et, wann ech richteg verstanen hunn, ëm d'„position limits“ geet. Dat heescht, datt et drëms geet, datt een d'Grenzwärter, wivill Undeeler eenzel Finanzhändler u sech an engem Maart kënnen halen, nach ëmmer op eng Handvoll begrenz ass - véier, fënnef Leit - an datt dat weiderhin nach ëmmer bemängelt gouf, datt dat awer nach ëmmer kéint problematesch sinn. Dat heescht, datt nach ëmmer relativ weëneg Akteure kéinten deemno wéi nach e gewëssenen Afloss hunn op gewësse Mäert.

Also do ginn et scho Suerger, déi do vun enger Partie vun der Zivillgesellschaft awer nach ëmmer ausgedréckt goufen. An an deem Sënn wärte mir eis dann och u sech enthalten. Mir wëllen net dergéint sinn, well et wahrscheinlech a gewëssener Hissicht e bëssen zu enger besserer Reglementéierung féiert. Mä mir wëllen eis awer och net d'Hänn banne loossen, well mer awer och der Meenung sinn, datt et net wäit genuch gaangen ass an datt mer héchstwahrscheinlech nach mat weidere Krise musse rechnen.

An da gesi mer och, wann déi nächst Krise kommen, déi Leit op der Finanzplaz, déi haut esou vill Suerger hunn, wa Saache reglementéiert ginn, a wann eng nächst Kris kennt an där vläicht och d'Bevölkerung eppes ze spiere kritt, wéi populär dann och déi gewësse Leit wäerten dosto, déi sech géint d'Regelunge gewiert hunn. (veuillez lire: An da gesi mer och, wann déi nächst Krise kommen, vun deene vläicht och d'Bevölkerung eppes ze spiere kritt, wéi populär déi Leit op der Finanzplaz, déi haut esou vill Suerger hunn, wa Saache reglementéiert ginn, wäerten dosto.)

Ech soen lech Merci.

► **Mme Simone Beissel**, *Présidente de séance.* - Merci dem Här Wagner. Mir hunn elo den Tour gemaach. Da géif ech den Här Finanz- a Budgetminister bidden, fir Positiounen ze huelen an op déi eng oder aner Fro ze äntwerthen. Här Gramegna, Dir hutt d'Wuert.

An elo ginn ech lech et nach eng Kéier hei op der Tribün.

Prise de position du Gouvernement

► **M. Pierre Gramegna**, *Ministre des Finances.* - Merci. Moien, Madamm Vizepresidentin.

(*M. Mars Di Bartolomeo reprend la présidence.*)

Dir Dammen an Dir Hären, ech soen lech Merci fir dee gudden Debat, dee mer elo just haten iwwert d'Transpositioun vun der Reglementatioun MiFID II, wéi se genannt ass, eng komplex Matière, mä eng ganz wichteg fir Lëtzebuerg a ganz besonnesch fir eis Finanzplaz.

Ech géif gären un dëser Stell fir d'Éischt dem André Bauler wierklech e ganz grouse Merci soe fir säi mëndlechen a schrëftleche Bericht a fir deen Interessi an deen Asaz, deen e gewisen huet, fir dës Matière ze meeschteren.

Ech deelen dat, wat den Här Mosar gesot huet, fir den Equipe Merci ze soen, déi dorop geschafft hunn, well et ass eng komplizéiert Matière, och fir Spezialisten, an et ass eng Matière, déi ganz séier evoluéiert. Ech géif och gäre besonnesch der Chamberskommissioun felicitéieren, dass se esou séier geschafft huet, nodeem mer den Avis vum Conseil d'État am Februar kritt hunn. Fir an zwee an en hallwe Mount, dräi Méint bal dat fäerdegzebréngen, dass mer dat haut kënne stëmmen, ass scho wierklech remarkabel.

Et ass esou, dass mir effektiv zu Lëtzebuerg immens impaktéiert si vun dëser Legislatioun, déi hir Urspréng huet am MiFID I an nach méi fréi, esou wéi den Här Fayot dat richteg beschriwwen huet. D'Wuert „Architektur“ ass gebraucht gi vum Här Mosar. Ech weess net, ob dat dat am beschte beschreift, mä den Impakt op déi existéierend Institutiounen, déi op der Finanzplaz tätég sinn, ass grouss. Et ass grouss am Fonctionnement vun der Bourse, et ass grouss am Fonctionnement vun der Fongenindustrie, fir déi zwee ze nennen. Et ass grouss och am Fonctionnement vun de Banken.

Dat Ganzt muss natierlech gelies ginn am Kontext vun der Weltfinanzkris, déi 2008 entstanen ass. A wann een zréckkuckt op MiFID I, do war d'Haaptziel, fäerdegzebréngen, dass Europa säi Marché financier géif besser integréieren. An ech mengen, dat ass och gelongen. Doropshin huet Lëtzebuerg sech och kënne gutt entwéckelen op där enger Säit, mä op där anerer Säit sinn d'Risiken ënnerschat ginn 2004. Dat soll elo déi nei Reglementatioun, déi mer haut hei transposéieren an d'Lëtzeburger Recht, änneren.

► **Une voix.** - Très bien!

► **M. Pierre Gramegna**, *Ministre des Finances.* - Déi zwee grouss Objektivt vun dëser Transpositioun sinn also fir d'Éischt, d'Transparenz an d'Resilienz vun de Finanzmarchéen ze assuréieren op där enger Säit, an zum Zweeten den Investisseur ze protegéieren a besser ze protegéieren, wéi dat virdrun de Fall war.

Wann ee schwätzt vu Resilienz an Transparenz vun de Finanzmarchéen, da mengt een och domat, dass ee géint eng Spekulation oder eng exzessiv Spekulation Mesuren aféiert, fir dass Saachen, wéi se 2008 geschitt sinn, net méi solle virkommen. Dozou déngt natierlech, dass een eng besser Informatioun huet, wie weéni Aktien oder Securities kaaft huet, an dat mécht de Reglement MiFIR, dee mir hei ëmsetzen, soudass een à tout moment kann nokuken, weéni eng Transaktioun geschitt ass.

Wat och ganz wichteg ass, dat ass, dass ee kann Transaktiounen ënnerbriechen. Dat heescht op Däitsch „Belastbarkeit der Systeme“ oder op Franséisch „coupe-circuit“, dat ass eng ganz wichteg Mesure; dat Wuert ass haut nach net gefall, dofir wollt ech et awer hei soen.

An och eng ganz wichteg Saach, wou all Mënsch versteet, dass dat vill geschitt ass an dass e puer Skandalen waren, dass och net eng Persoun oder eng Institutioun ka riseg Positiounen unhuelen, immens Risiken huelen, déi dee ganze Marché influenzéieren an dann zu Katastrophe kënne féieren. Ech mengen, dat sinn dräi wichteg Elementer, déi eng wëll Spekulation kënne verhënnern.

An dann ass natierlech haut eng ganz wichteg Saach d'Veaarbechtung vun den Informatiounen, vun den Daten, vun den Data, an dat gëtt och besser geregelt doduerch, dass dräi nei Statute geschafe gi fir déi Entreprises, déi dat als Metier maachen.

D'Protektioun vum Investisseur geschitt op verschidden Aart a Weisen - dat ass deen zweete grouse Punkt -, andeem fir d'Éischt d'Organer vun den Entreprises eng verstärkt Zäit musse verbréngen mat allem, wat mat Transaktiounen ze dinn huet. Dat ass souwuel wou fir de Conseil d'administration wéi och natierlech fir d'Direktioun vun der Bank. Do ass elo d'Responsabilitéit vill, vill méi grouss. An ech kann lech soen, MiFID II trëtt elo a Kraaft, mä et ass op ville Plaze schonn zu Lëtzebuerg an enzwousch anescht, dass all déi, déi an deene Conseilen dra sinn, sech bewusst sinn, dass hir Responsabilitéit vill méi grouss gëtt.

Dat Zweet ass natierlech, dass een och de Client besser informéiert an dass een em Produiten ubitt, déi sengem Profill entsprechen. Ech sinn och iwwerzeegt, dass Verschiddener vun lech als Client vun der Bank deen Exercice gemaach hu mat hirem Banquier, deen de Riskprofill versicht ze verstoen, an d'Konsequenz dovunner ass, dass en lech Produiten ubitt, déi Arem Riskprofill entsprechen. An da geet et net duer, dass een de Profill vum Client kennt. Et muss een dann och Produiten ubidden, déi

deenen Ufuerderungen entsprechen. Alles dat ass hei an der MiFID II virgesinn. An da muss och séchergestallt ginn, dass déi Produiten, déi hei offréiert ginn, onofhängeg si vun deenen, déi de Banquier selwer entwéckelt.

Zum Schluss nach vläicht zwou Saachen. Déi eng, déi, mengen ech, nach net gesot ginn ass, déi awer wichteg ass, ass, dass e Label hei agefouert gëtt fir PMEen, wat eng ganz wichteg Saach ass, fir dass den Accès fir PMEen méi einfach gëtt op deene Finanzmäert.

An déi lescht Remark huet mat der CSSF ze dinn, déi natierlech hei déi Institutioun ass, déi d'Supervisioun mécht an derfir suergt, dass d'Akteuren alleguerten déi Regele wäerten anhalen. D'Pouvoir vum der CSSF an d'Sanktionsmëglechkeete ginn hei méi breet gemaach.

Ech mengen, dat wär e Résumé, deen ee kéint maache vun deem, wat hei decidéiert gëtt. Ech wëll op e puer Froen, déi gestallt gi sinn, agoen.

Fir d'Éischt emol fir mech effektiv ze freeën, dass den Här Mosar och et richteg ageschat huet, dass et gutt ass, dass mer hei keng Retroaktivitéit virgesinn. Dat schéngt mer wichteg.

Dat Zweet, dat ass de Rôle vun der CSSF, deen hei erëm eng Kéier gestärkt gëtt. Dir hutt mer d'Fro gestallt, wéi et dann en général mat de Pouvoir vun der CSSF ass, well mer do Froen vu Gouvernance gestallt kruten. Ech kann lech soen, dass de Finanzministère op eng Modernisatioun vum Mechanismus vun de Sanktiounen an der CSSF hischafft. Mir inspiréieren eis do un deem, wat Frankräich gemaach huet oder amgaangen ass ze maachen, dat heescht eng Separatioun vun dräi Saachen: Wien d'Poursuite mécht an d'Enquête, dat wär weider muer, wann dat da fäerdeg ass, d'CSSF. An dann d'Sanktiounen selwer géife vun engem Conseil de sanctions gesprach ginn.

Dat ass de Wee, op dee mer wëlle goen. An d'Equipe schaffen dorop, an de But ass, fir virun Enn des Joers mat engem Projet do fäerdeg ze sinn, wéi gesot sech inspiréierend un deem, wat a Frankräich elo gemaach gëtt. An domat wäere mer dann och konform mat deene leschte Jurisprudenzen.

En zweete Punkt, deen ech wëll hei ugoen, dat ass dee vum „level playing field“. Dat ass ganz richteg, dass mer mussen ëmmer oppassen, dass all Mënsch dat heiten transposéiert. A wa mer da bannen an der EU sinn, kann ech lech soen, dass mer nach am März vun dësem Joer an der folgender Situatioun waren, dass zéng Länner MiFID II nach net ëmgesat haben. Mir sinn eent vun deenen zéng. Haut setze mir dat dann ëm. Mir wäerten elo an den nächsten Deeg a Wochen och monitoren, wéi dat evoluéiert. Mä ech si ganz zouversiichtlech an der EU, dass mer alleguerten dat wäerten ëmsetzen.

Mä baussen der EU, dat war eng aner Fro, déi gestallt ginn ass: Wat maachen d'Amerikaner op all deene Sujeten? Bon, si sinn natierlech net gebonnen u MiFID II, si sinn net an der Europäescher Unioun, mä si hunn äänlech Regele. Wat maache se mam Delaware? Wat maache se am Kontext - dat geet e bësse méi wäit wéi d'Diskussioun hei, Dir hutt mer d'Fro gestallt - vum Iran? Wat fir en Impakt huet dat, wann Amerika aus dem „nuclear deal“ erausgeet?

Et ass jo evident, dass mer do als Lëtzeburger dat nëmme kënnen observéieren, wéi dat weidergeet. Mä et muss een awer och realiséieren, dass d'Amerikaner zum Beispill mat hirer Steuerreform, déi se d'lescht Joer adoptéiert hunn, eng ganz Serie vu Mesurén vu BEPS ëmgesat hunn! Et ass och net esou, dass Amerika sech un näischt hält. Ech mengen, et muss een dat au cas par cas kucke bei deene verschiddene Mesuren. Mir wäerten dat op jidde Fall ganz no suivéieren, well dat natierlech e ganz wichtigen Deel vun de Geschäfte ass, déi och zu Lëtzebuerg gemaach ginn.

An da géif ech gären e puer Remarke maachen zu deem, wat den Här Fayot richtegerweis hei ënnerstrach huet. Doduerch, dass mer dat hei elo transposéieren, kann d'CSSF erëm voll hire Rôle spillen an der Kooperatioun mat aneren Organer an Europa an dat ass begreissenswäert.

Eng Fro, déi mer, mengen ech, alleguerten am Hannerkapp hunn, ass déi, ze wëssen, ob mer da mat dëser Reglementatioun d'Riske vun enger Kris, vun enger futurer Kris méi kleng maachen, Riske vun Derapagen, vu Spekulationen, déi wéi da mat engem Schnëiballeffekt ganz schlëmm Konsequenze kënnen hunn,



net nëmme fir eise Secteur financier, mä fir dee vu ganz Europa oder vun der ganzer Welt.

Ech mengen, do kennt keen d'Äntwert drop! Mä ee Beispill, wat haut genannt ginn ass vum Här Fayot, deelen ech ganz bestëmmt, dat ass dat vun de Cryptocurrencies, vun de Monnaies virtuelles. Dat ass eng ganz nei Welt. Mir hunn en Debat hei an der Chamber virun e puer Wochen doriwwer gehat. An déi falen net hei drënner! An et gëtt och keng einfach Léisung, fir ze soen: Déi falen elo drënner an dann ass dat esou! Dat géif och net esou kënnen eent zu eent ëmgesat ginn.

Mir wëssen, dass d'Zentralbanke vun der ganzer Welt amgaange sinn, sech Froen ze stellen, wéi een déi Emissioun vu Cryptocurrencies, vu Monnaie-virtuellë kéint encadréieren. Do gëtt et nach näischt. Wéi den Transfer vun der virtueller Welt an dann déi normal Wärunge, wéi dat muss kontrolléiert ginn, alles dat si Froen, déi am Raum stinn, mä wou et nach keng Äntwerte ginn.

Déi eenzeg Berouegung, déi een de Moment nach kann hunn, dat ass, dass d'Monnaie-virtuellen, obwuel se vill gewuess sinn an de leschten zwee Joer, nach awer Quantitéiten erreechen, déi nach net esou dramatesch héich sinn. Mä dat ass nëmme en Trouscht. An dat hei ass ee Risk, deen hei évoquéiert ginn ass, deen also vun de Cryptocurrencies, dee bestëmmt reell ass an dee muss an d'A gefaasst ginn. Mä et gëtt der wahrscheinlech anerer, déi mer net kennen an op déi een och muss Uecht ginn, soubal se dann entspringen.

A mäi leschte Punkt ass dee vun der Komplexitéit vun der Matière. Jo, d'Matière ass komplizéiert. Eis Welt ass haut komplizéiert. Mir hu jo och haut Maschinnen, déi d'Saache vill méi séier an akut kënnen kontrolléieren. Mä trotzdem, vläicht dierfte mer eng Saach net vergiessen: Hei ass Europa erëm amgaangen, wegweisend ze agéieren! Mir sinn déi, déi déi meescht, déi sophistiquéiert Reglementatioun hei op d'Bee setzen. Wa mer dann nach bedenken, dass mir eis müssen zu 28 eens ginn, fir dat ze maachen, dann ass dat d'autant plus bewonnernswäert!

An déi, déi Europa vill kritiséieren a soen, „Europa versteet een net!“, deene muss een äntwerten: „Et huet kee Wäert, dass Der déi dausend Säite vum MiFID liest, fir Europa ze verstoen, mä Dir kënnt - an dat kann een zu Lëtzebuerg ganz gutt bewiesen -, Dir kënnt gesinn, dass Europa funktionnéiert, well mat deene Regeln, déi mer hunn, kënnen mir zu Lëtzebuerg eng Finanzplaz hunn, déi uerdendlech funktionnéiert, déi eng gutt Reputatioun huet an déi zum Wuelstand vun eisem Land bäidréit.“

Hei ass een Domän, wou Europa gutt agéiert, wegweisend ass, eng Integratioun mécht, déi keen anere bis elo fäerdegbruecht huet. An ech mengen, doriwwer kann ee sech och freeën.

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - Jo, den Här Mosar huet d'Wuert.

► **M. Laurent Mosar (CSV).** - Jo, Merci dem Finanzminister fir all déi vill a gutt Explikatiounen. Ech begrëssen och, datt e Projet de loi nach annoncéiert ass virum Enn vum Joer iwwert déi Separatioun. Et ass eng exzellent Saach.

Ech wollt awer nach op ee Punkt agoen, well Der deen och ugeschwat hutt, Här Finanzminister, well mer virdrun och am Kader vun de Relatiounen, de geschäftleche Relatiounen mat Iran dorobber ze schwätze komm sinn, well ech mengen, datt dat awer misst um Niveau vun der OECD gekläert ginn. Dat ass, wann elo Sanktiounen komme vun den Amerikaner géint Entreprises, déi awer weider wëllen am Iran investéieren, och well den Accord dann tëschent Iran an der Europäescher Unioun weider wäert oprechterhale ginn, dann ass e ganz grouse Risiko, datt déi Banken, déi mat deenen Entreprises do wäerte schwätzen oder schaffen, ee Moment kee Clearing méi an Dollare kréien. Dat heescht, datt de facto - a mir hate jo schonn esou Fäll - déi Banke kënnen zoumaachen.

An ech wollt do och nach eng Kéier dem Finanzminister d'Fro stellen, ob een net awer eng Kéier misst déi Thematik och um Niveau vun der OECD ugoen, well et ka jo net sinn, datt hei vun amerikanescher Säit iwwer esou eng Mesure eigentlech den Handel mat verschiddene Länner total onméiglech gemaach gëtt!

► **M. Mars Di Bartolomeo, Président.** - Här Finanzminister, Dir hutt d'Wuert.

► **M. Pierre Gramegna, Ministre des Finances.** - Ech deelen d'Analys vum Här Mosar, dass mer hei e Risk hunn, wéinst der amerikanescher Attitüd als Europa virun e Fait accompli gesat ze ginn. Nun, wat déi richteg Plaz ass, fir dat ze diskutéieren, steet am Raum. Ech fannen Är Iddi vun der OECD exzellent, muss ech soen. Mä ob wierklech d'OECD dann herno déi Plaz wäert sinn, wou dat diskutéiert gëtt, weess ech net. Mä et ass eng Iddi, déi ee kéint poursuiwéieren.

Dat Zweet, wat ech wëll soen, ass, wann déi aner Länner, déi an deem Accord mam Iran verwickelt waren, dee wëlle weiderdreiwen, jo, da muss een déi Modalitéiten elo emol kennen. Wann ech awer elo kucken, wat d'Situatioun elo scho mam Iran war, hate mer nach ëmmer oder schonn ëmmer en Damoklesschwäert iwwert dem Kapp. An d'Damoklesschwäert iwwert dem Kapp ass wat? Majo, wann een Transaktiounen an Dollare mécht als Europäer!

Soulaang een net an Dollare schafft, dann huet ee manner en Damoklesschwäert iwwert dem Kapp. Mä wann ee mam Dollar schafft, wat awer mat deenen Drëttlänner bal ëmmer de Fall ass, huet een ëmmer de Risk, dass d'amikanesch Autoritéite soen: „Well Der an Dollare geschafft hutt, mësche mir eis an a mir kënnen do soen, dass d'Reglementatioun vun Amerika net agehale ginn ass.“ Dat ass eng ganz schwierig Diskussioun, déi mer an de leschte Méint jo nach eng Kéier erlieft hunn am Kontext vun enger spezifischer Bank, déi mer awer och gesinn hu fir eng grouss franséisch Bank, déi huet misse Milliarden Amendé bezuelen, well se verschidden Transaktiounen mam Iran gemaach hat.

An ech kann lech just soen, dass bei deene meeschte Banken, mat deenen ech geschwat hunn, déi hei zu Lëtzebuerg tätég sinn, eng ganz grouss Prudenz besteet par rapport zum Iran, well een dee Facteur vun der Utilisatioun vun der amerikanescher Währung jo ni kann ënerschätzen (veuillez lire: aschätzen), dee Risk, deen dee bréngt. An dann ass natierlech och d'Perspektiv vu Profitier, déi ee ka maachen, esou a Fro gestallt, well een dann e Risk huet, deen ee guer net ka moossen.

Mä ech mengen, Lëtzebuerg muss dat vu ganz Noem observéieren. An ech wäert natierlech dee Message mathuelen, dass een e Forum misst fannen, wou een dee Sujet kéint oppen diskutéieren. Well dat Schlëmmst, wat Europa ka geschéien an där Saach, ass, dass iwwerhaupt net driwwer geschwat gëtt an dass déi Onsécherheet einfach am Raum stoe bleift.

► **M. Mars Di Bartolomeo, Président.** - Merci.

Mir sinn domat prett, fir iwwert de Projet de loi 7157 ofzestëmmen.

Vote sur l'ensemble du projet de loi 7157 et dispense du second vote constitutionnel

D'Ofstëmmung fänkt direkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass elo eriwwer.

58-mol Jo, 2-mol Enthaltung: Domat ass de Projet de loi 7157 ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par M. Laurent Mosar), Claude Wiseler, Michel Wolter et Laurent Zeimet;

MM. Marc Angel, Frank Arndt, Mme Simone Asselborn-Bintz, M. Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen (par Mme Cécile Hemmen) et Mme Cécile Hemmen;

MM. André Bauler, Gilles Baum, Mme Simone Beissel, MM. Eugène Berger, Frank Colabianchi, Lex Delles, Mme Joëlle Elvinger, MM. Gusty Graas, Max Hahn (par M. Claude Lamberty), Alexander Krieps, Claude Lamberty, Edy Mertens et Mme Lydie Polfer (par M. Eugène Berger);

MM. Gérard Anzia (par Mme Viviane Loschetter), Henri Kox, Mmes Josée Lorsché, Viviane Loschetter, Sam Tanson et M. Roberto Traversini (par Mme Josée Lorsché);

MM. Gast Gibéryen, Fernand Kartheiser et Roy Reding.

Se sont abstenus: MM. Marc Baum (par M. David Wagner) et David Wagner.

Ass d'Chamber bereet, d'Dispens vum zweete Vott ze froen?

(Assentiment)

Merci. Dann ass dat och esou decidéiert.

Mir géifen dann zum nächste Projet iwwergoen, de Projet 7165, eng Direktiv iwwert

d'Wäertpabeieren. An de Rapporteur, den honrabelen Här André Bauler, ass prett, fir de Rapport ze maachen. Dir hutt d'Wuert, Här Bauler.

13. 7165 - Projet de loi relative aux dépositaires centraux de titres et portant mise en œuvre du règlement (UE) n°909/2014 du Parlement européen et du Conseil du 23 juillet 2014 concernant l'amélioration du règlement de titres dans l'Union européenne et les dépositaires centraux de titres, et modifiant les directives 98/26/CE et 2014/65/UE ainsi que le règlement (UE) n°236/2012

Rapport de la Commission des Finances et du Budget

► **M. André Bauler (DP), rapporteur.** - Merci, Här President. Léif Kolleginnen a Kollegen, dëse Gesetzesprojekt huet d'Zil, fir bestëmmten Dispositiounen vum Reglement N°909 vum 23. Juli 2014 iwwert d'Verbesserung vum Reglement vun den Titren an der Europäescher Unioun an iwwert d'Dépositaires centraux de titres a Kraaft ze setzen. Duerch dëst Reglement ginn och nach d'Direktiven 98/26/CE an 2014/65/UE souwéi d'Reglement 236 aus dem Joer 2012 ofgeännert.

D'Reglement stellt uniform Exigenzen op, wann et ëm de Règlement vu Finanzinstrumenten an der Unioun geet, souwéi Regeln, déi d'Organisatioun vun den Dépositaires centraux de titres, déi sougenannt DCT betreffen. Dës Regele betreffen natierlech och d'Aktivitéite vun den DCT an hiert konkret Verhalen an dësem Kontext. Zweek bekannte Beispiller vun Dépositaires centraux de titres sinn Euroclear a Clearstream. Dat si jo Nimm, déi lech eppes soen.

D'DCT exploitéieren d'Systemer, déi den Handel mat Titre regelen, si garantéieren och de Suivi vun der Zuel vun Titren, déi emetteiert ginn, d'Identitéit vun den Emetteuren an all Annerung, wat de Besëtz vun Titren ugeet. D'DCT droen also net nëmme zum gudden Fonctionnement vun de Finanzmäert bäi, si ginn och den Akteure vun dëse Mäert d'Vertrauen, dass all Transaktiounen korrekt ausgefouert ginn, an dat an där gewolltener Zäit.

Obwuel d'Reglement an all sengen Elementer direkt unzewennen ass, also, wéi dat esou schéin heescht, d'application directe ass, léisst et awer dem Parlament, also dem Législateur, de Choix, fir déi national an zoustänneg Autoritéit ze bestëmmen, déi fir den Agreement an d'Iwwerwaachung vun den DCT zoustänneg ass.

De Gesetzesprojekt schléit fir, dës Missiounen eiser CSSF unzevertrauen. D'CSSF wäert déi néideg Pouvoire kréien, fir dës Aufgaben ze erfëllen. Déi hunn net nëmme mat der Iwwerwaachung eppes ze dinn, ma och mat Beräicher wéi Interventioun, Inspektioun an der Méiglechkeet, fir ze enquêtéieren, wann et dann néideg ass.

De Gesetzesprojekt féiert och e Regimm vun de Sanktiounen an. Et sinn dat effektiv, proportionéiert an dissuasiv, also ofschreckend Sanktiounen am Fall, wou d'Reglement mëssuecht gëtt. D'CSSF ass och dozou verfléicht, fir wirksam Mechanismen anzusetzen, déi et erlaben, potenziell oder net ze bestreidend Violatiounen vum Reglement, dem Gesetzestext, deen eis hei virläit, oder Moossnamen, déi fir d'Ausféierung geholl ginn, ze notifiéieren.

Da soll och nach präziséiert sinn, dass mat dësem Gesetzesprojekt guer keng direkt Iwwerwaachungskompetenz am Kader vun den DC-Ten enger europäescher Autoritéit soll iwwermëttelt ginn. Fir all aner Detailler verweisen ech op de Commentaire des articles.

Zum Avis vum Statsrot wëll ech nach e puer Präzisatiounen liwweren. Dësen Avis ass den 20. Februar dëses Joers komm. De Statsrot huet doranner bemierkt, dass verschidden Dispositiounen vum Gesetzesprojekt schonn am Reglement drastinn. Well d'Reglement awer d'application directe ass an iwwert dësem Gesetz steet, brauchen dës Dispositiounen net am nationale Gesetz widderholl ze ginn. Dat ass besonnesch de Fall bei den Dispositiounen, déi d'CSSF verfléichten, bestëmmten Entscheidungen der zoustänneger europäescher Autoritéit ze notifiéieren, also matzedeelen. Dozou wëllt ech awer ergänzen, dass d'Reglement net an alle Fäll präziséiert, wéi eng national Autoritéit fir eng bestëmmten Notifikatioun zoustänneg ass. An deene Fäll ass et nëtzlech, fir am Gesetz ze präziséieren, dass dës Notifikatiounen solle vun eiser CSSF gemaach ginn.

Déi héich Kierperschaft war dann och nach der Meinung, dass dës Projet der Verfléchtung, fir Sanktiounen an aner administrativ Moossnamen ze etabléieren, déi d'Persoune betref-

fen, déi d'Dispositiounen vun dësem Reglement mëssuechten, net komplett nokomm ass. Dofir hat de Statsrot dann och eng Opposition formelle ausgeschat mat der Remark, dass de Gesetzgeber sech dorobber beschränkt, fir Obligations de résultat ze imposéieren, ouni dass d'Netrespektéieren vun dësen Obligatiounen an dësem Projet awer viséiert wier.

Dëser Remark ass selbstverständlech Rechnung gedroe ginn, soudass de Statsrot seng formell Oppositioun a sengem Avis complémentaire vum 24. Abrëll 2018 konnt ophiewen.

Dat gesot, ginn ech den Accord vu menger Fraktioun a soen lech Merci fir d'Opmierksamkeit.

► **Plusieurs voix.** - Très bien!

► **M. Mars Di Bartolomeo, Président.** - Merci och. An d'Wuert huet den Här Laurent Mosar.

Discussion générale

► **M. Laurent Mosar (CSV).** - Jo, Merci. Et ass de Mëtteg Bauler-Day.

(Interruptions et hilarité)

Nach eng Kéier e ganz grouse Merci fir eisen exzellente Rapporteur. Hei ass nach eng Kéier e wichtege Mosaiksteen an der Politik vun der Finanzplaz. Och hei brénge mir natierlech den Accord vun der CSV-Fraktioun.

► **M. Mars Di Bartolomeo, Président.** - Merci. Den Här Fayot huet d'Wuert.

► **M. Franz Fayot (LSAP).** - Jo, och vu menger Säit e Merci un de Rapporteur, dee ganz ausféierlech war a sengem mëndleche Bericht. An ech géif och den Accord gi vun der LSAP-Fraktioun zu dësem Projet de loi.

► **M. Mars Di Bartolomeo, Président.** - Merci. D'Madamm Loschetter huet d'Wuert.

► **Mme Viviane Loschetter (déi gréng).** - Jo, Här President, och mir ginn den Accord zu dësem Projet de loi a soen dem Här Bauler Merci fir déi Aarbecht, déi e sech gemaach huet bei dësem Projet.

► **M. Mars Di Bartolomeo, Président.** - Merci. Den Här Reding huet d'Wuert.

► **M. Roy Reding (ADR).** - Ech wollt mech just de Wieder vu menge Virriedner uschlëssen an den Accord vun der ADR zu dësem Projet bréngen.

► **M. Mars Di Bartolomeo, Président.** - Merci. Domat si mer um Enn vun der allgemenger Diskussioun ukomm. An den Här Finanzminister huet d'Wuert.

Prise de position du Gouvernement

► **M. Pierre Gramegna, Ministre des Finances.** - Merci, Här President. Ech freeë mech och, dass mer hei esou e breede Konsens hunn,...

(Hilarité)

...a soen dem André Bauler nach eng Kéier Merci fir säi schrëftlechen a mëndleche Bericht.

Et ass esou, dass mer hei och e puer Punkten haten, wou de Conseil d'État Schwierigkeete gemaach huet. Ech freeë mech, dass mer déi konnte léisen, a freeë mech, dass mer duerch dës Gesetzgebung eng méi effikass an eng méi sécher Reglementatioun hunn, wat déi Dépositaires centraux de titres sinn, déi wichteg Akteure sinn. Dir wësst, dass ee vun deenen zwee Groussen hei zu Lëtzebuerg tätég ass. Dat huet also en direkten Impakt op eis Finanzplaz. An dofir freeën ech mech, dass mer dee breede Konsens hei hunn.

► **M. Mars Di Bartolomeo, Président.** - Merci. Da kënnen mer zur Ofstëmmung iwwert de Projet de loi 7165 iwwergoen.

Vote sur l'ensemble du projet de loi 7165 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen. An d'Ofstëmmung ass eriwwer.

60-mol Jo. Domat ass de Projet de loi 7165 mat Unanimitéit ugeholl.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes, Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes (par M. Marcel Oberweis), Claude Wiseler, Michel Wolter et Laurent Zeimet;

MM. Marc Angel, Frank Arndt, Mme Simone Asselborn-Bintz, M. Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen (par M. Alex Bodry) et Mme Cécile Hemmen;

MM. André Bauler, Gilles Baum, Mme Simone Beissel, MM. Eugène Berger, Frank Colabianchi,